

30 tahun atasi pencemaran sungai

BH 5/12/2006

MASALAH pencemaran sungai di negara ini memerlukan sehingga 30 tahun untuk diatasi dan mengembalikan sistem saliran kembali pada tahap normal dan bersih, kata Ketua Pengerah Jabatan Alam Sekitar (JAS), Datuk Rosnani Ibarahim.

Beliau berkata, kurang separuh daripada 146 sungai di seluruh negara bersih manakala 15 lagi tercemar teruk dan sembilan dikategorikan sebagai sungai mati.

Katanya, dua pertiga daripada sungai tercemar akibat kumbahan premis kediaman dan perniagaan yang masih menggunakan teknologi lapuk seperti

tangki septik dan kolam pengoksidaan untuk merawat kumbahan.

"Sistem ini tidak berkesan merawat kumbahan yang menjadi punca utama pencemaran sungai di negara ini. Malah, pelepasan sisa dari kilang juga tidak serius berbanding kumbahan dari premis kediaman dan perniagaan," katanya.

"Saya menjangka kita perlu ambil masa 20 hingga 30 tahun sebelum sungai kita kembali bersih. Kita perlukan sistem yang lebih baik untuk merawat kumbahan yang dilepaskan ke sungai," katanya ketika membentangkan kertas kerja bertajuk Isu dan Cabaran Dalam Menguatkuasa-

kan Undang-Undang dan Peraturan Alam Sekitar pada Simposium Pengurusan Alam Sekitar di Akademi Audit Negara, semalam.

Sementara itu, katanya, jangkaan tinggi orang ramai adalah antara isu dan cabaran utama yang dihadapi agensi kerajaan dalam usaha memulihara alam sekitar.

Beliau berkata, isu dan cabaran lain ialah sikap tidak bertanggungjawab sesetengah pihak yang sengaja melanggar undang-undang berkaitan alam sekitar.

"Cabaran lain adalah hukuman tidak setimpal kepada pesalah, peningkatan sumber pencemaran, kurang

penguatkuasaan, pengawasan dan kepakaran. Ada juga masalah alam sekitar yang tidak tertakluk kepada Akta Kualiti Alam Sekitar (EQA) 1974," katanya.

Bagi menangani semua isu itu, Rosnani berkata, ia memerlukan pengubalan EQA 1974 serta menganjurkan program latihan komprehensif dan sistematik kepada pegawai penguat kuasa serta pengurus alam sekitar.

Katanya, langkah lain ialah meningkatkan penguatkuasaan, menjalin kerjasama dengan agensi sukarrela seperti Relas untuk memantau alam sekitar serta program pensijilan dan pengauditan alam sekitar.